

Samgöngu- og sveitastjórnarráðuneytið
Skúli Þór Gunnsteinsson og Sigurjón Ingvason
Sölvhólsgrötu 7
101 Reykjavík

Reykjavík, 15. ágúst 2018

Efni: Frumvarp til laga um öryggi net- og upplýsingakerfa mikilvægra innviða (Mál nr. S-79/2018)

Viðskiptaráð þakkar fyrir tækifærið til að koma sjónarmiðum sínum á framfæri um frumvarp til laga um öryggi net- og upplýsingakerfa mikilvægra innviða.

Helstu atriðin sem Viðskiptaráð vill koma á framfæri eru eftirfarandi:

- Hið opinbera á ekki að standa í samkeppni við einkaaðila á markaði.
- 13. grein frumvarpsins ætti að falla brott.

Opinber samkeppnisrekstur

Frumvarp til laga um öryggi net- og upplýsingakerfa mikilvægra innviða felur í sér innleiðingu á tilskipun Evrópuþingsins og ráðsins nr. 1148/2016/ESB, eða NIS tilskipuninni. Markmið laganna er eins og segir í 1. gr. frumvarpsins að stuðla að háu öryggisstigi net- og upplýsingakerfa mikilvægra innviða. Viðskiptaráðs fagnar þessu þar sem slíkt öryggi verður sífellt mikilvægara að tryggja í netvæddu samfélagi. Með frumvarpinu er þó að mati Viðskiptaráðs gengið lengra en nauðsyn krefur og ekki er gætt samræmis við innleiðingu tilskipunarinnar, en slíkt hefur áhrif á þá aðila sem teljast vera rekstraraðilar mikilvægra innviða.

Viðskiptaráð tekur undir sjónarmið Samtaka Atvinnulífsins og Samtaka Iðnaðarins, sem skiluðu sameiginlegri umsögn þann 20. júlí síðastliðinn, en vill auk þess koma á framfæri eftirfarandi athugasemdum við frumvarpið.

Með 13. gr. frumvarpsins er aðilum sem ekki falla undir gildissvið laganna, sem sagt öllum aðilum á Íslandi sem netöryggissveitin þjónustar ekki á grundvelli laganna, boðinn sá möguleiki að semja við netöryggissveit um ráðgjöf, aðstoð og viðbúnað til að verjast mögulegum netárásum á net- og upplýsingakerfi þeirra gegn þóknun. Nauðsyn eða tilurð 13. gr. frumvarpsins kemur ekki skýrt fram í greinargerð, og sambærileg þjónusta er ekki í boði í nágrannalöndum okkar.

Viðskiptaráð hefur í mörgum tilfellum kallað eftir auknum leiðbeiningum af hálfu hins opinbera til atvinnulífsins og fagnar allri viðleitni stjórnvalda til þess. Ráðgjöf eða leiðbeiningar stjórnvalda á sviði netöryggis á grundvelli 13. gr. frumvarpsins virðast hins vegar ganga lengra þar sem hlutverk netöryggissveitar er ekki eingöngu leiðbeinandi heldur í beinni samkeppni við einkaaðila um keypta ráðgjöf. Nú þegar eru til staðar einkaaðilar sem bjóða sambærilega þjónustu og þá sem netöryggissveit

er heimilað að veita með 13. gr. frumvarpsins. Viðskiptaráð telur slíka samkeppni óheilbrigða þar sem verulegur aðstöðumunur er til staðar milli opinberra aðila og einkaaðila.

Því er ekki að sjá þörfina fyrir því að hið opinbera veiti þá þjónustu sem því er heimilað með 13. gr. frumvarpsins. Hlutverk stjórnvalda á markaði er að stuðla að heilbrigðu atvinnulífi, þar sem samkeppni og markaðslögmál fá þrífist, án óþarfa inngripa eða röskunar. Stjórnvöld ættu því að marka sér þá stefnu að fara af markaði þegar einkaaðilar hasla sér völl á samkeppnismarkaði. Að sama skapi ættu stjórnvöld að nýta tækifæri til að færa verkefni úr höndum hins opinbera til einkaaðila. Viðskiptaráð leggur til að 13. gr. frumvarpsins falli brott.

Viðskiptaráð býður jafnframt fram krafta sína við frekari vinnu á frumvarpinu sé þess óskað. Að lokum áskilur Viðskiptaráð sér rétt til að koma frekari athugasemdum á framfæri á síðari stigum og er reiðubúið að skýra þessa umsögn nánar og svara spurningum, sé þess óskað, ýmist í ráðuneytinu eða á fundi þingnefndar.

Virðingarfyllst,



Gunnar Dofri Ólafsson
Lögfræðingur Viðskiptaráðs Íslands